

文編

文與獻並重道之所在有明徵也自方志以詩文入藝文既乖古法而文日繁無足輕重者多矣茲別錄爲文編止擇其有關邑中利弊及文獻之所由存者存一方之典實焉志文編而以王少伯詩附之

李世鐸

東海人湖廣分巡靖州道駐劄沅州提刑按察司僉事

黔陽縣志序

康熙四年

黔陽令張子寄余縣志十卷問序於余其間志分野志災異凡例二有天道焉志縣圖志邑署志城郭坊鄉志田賦物產志山川形勝界至凡例九有地道焉若夫志沿革志戶口志風俗志徭役驛遞志祀典樂舞志祠祀寺觀志橋梁古蹟志人物宮室志秩官選舉志耆德殉難志孝行節烈志文藝武備方外凡二十有二有人道焉余展讀再四掩卷而嘆曰有天地後皆人事也第自昔迄今吏茲土者接踵比肩後先輝映宜其裒集宏多紀載彌盛矣何前人爲其略而今則爲其詳也且立乎今日以指往昔蒙業而安吏道容與潤色太平亦易易事我

朝驅除大難景運肇開庶務熙明百度維新兼之祖龍地燼舊聞放失之後而欲問藏書於柱下訪軼事於老成未免甲乙滋淆魯魚莫辯之憾是前人爲其易而今實爲其難也有心哉張子乎自有此志以藪爾之黔儼然以文獻稱望邑俾觀風者知所采攷實者有所據然則觀天地以察時變觀人文以幾化成者此物此志也雖然孔子有言曰與其託諸空言不如見諸實事之深切著明也何以感天和何以盡地利何以答人心求其輔相天地之宜以

左右斯民而不負父母之任神而明之存乎其人張子勗哉是爲序

陳士本

湖廣分巡湖北道布政司叅議兼按察司副使

黔陽縣志序

康熙五年

嘗謂有國者必識足以周一國而後可以治一國自秦改列國爲郡縣而今之蕞爾邑即昔之子男附庸也設非識足以周之其能勝任而愉快乎矧歷稽爲邑之名曰宰曰令曰尹至宋建隆初除赤畿外有望繫上中下三等以朝臣爲知縣知縣之名始此後遂相沿不改顧名以思宰與令以言柄也爲主持一邑而使令之也尹言德也子帥以正孰敢不正之謂也知猶主也亦言識也主持其民人社稷又能取一邑之風俗民情土田山川人戶版籍以及官師食貨人物藝文之類而討究之包吞心府之中循環目圍之

黔陽縣志

卷第五十七 文編一

二

內而能一一措置得所也循名責實豈易副哉猶憶明初設立憲綱凡筮仕縣官即授以受事湏知一冊計其目凡三十一條始以祀神終以警人跡其間巨細畢舉境內之一民尺土利弊因革展冊犁然不殊觀火所以下多良牧迨其後典吏虛循故事官亦不甚省覽湏知全文付之泯沒其可爲民牧指南者少矣恭遇我朝車書一統優武修文楚省部院各憲因擬彙修通省志書檄徵各色非徒侈競文藻以誇炫聽聞夫亦欲任是邑者留心攷訂周知一邑之所誌而出政臨民訓方型俗意甚善也其如湖南半壁久罹兵火各邑舊志十不存一况黔陽於順治十五年始再入版圖者乎賴有張君實知是邑遵檄修纂備極旁蒐良史之才未之或過書成郵余余見其條分縷析凡三十有五每目冠以一論命意周至訓辭典雅足備勸戒是志也是亦一受任湏知也張君惟能

周知一邑迺綱舉目張而爲是書以一出政臨民訓俗型方不幾  
勝任而愉快乎俾後來披是書者洞若燃犀周知一邑有益治道  
亦非渺小矣循名責實豈有負哉是爲之序

鄢翼明

字在公三韓人知辰州府事

黔陽縣志序

康熙五年

志者事之實也言者身之文也事不實則不可以與言身不文則  
不可以明志言之關乎一身猶志之係乎一邑也一邑之有山川  
人物猶一身之有地水火風倘地水火風之果不生不滅則山川  
人物之亦不減不增又何以見夫天運之循環地脈之興衰制度  
之沿革歲時之災祥風俗之淳漓耶殊不知淳漓之辨災祥已有  
定分沿革之因廢興與之循環居今之世倣古之道使文獻不足徵  
也則吏治之得失莫證得失莫證則禮樂刑政將何所取監而適  
黔陽縣志

卷第五十七

文編一

三

從乎必使前之爲傳後之爲繼則誌之一書誠綦重矣故曰明鏡  
所以照形往古所以知今良有以也今黔陽縣志書自前正德年  
間纂修後嗣無續史之人矣且因兵火疊罹百度俱廢舊志亦復  
無存歷

本朝二十餘年始得容園張令博采舊聞訪之遺老得其梗概編  
而成書分其目爲三十有五別其卷爲十十者成也其數爲偶其  
爻得坤五者陽也其數爲奇其象得乾乾坤之義不外乎陰陽陰  
陽之理取似乎奇偶素問所註陽亢則害陰乃承制又曰孤陽不  
長孤陰不成陰之爲患則爲水爲澇陽之見亢則爲旱爲災由是  
而知戶口之流亡田野之荒蕪宮室之傾頽古蹟之湮沒人物之  
變遷總由於陰陽之失序也夫使乾坤定位奇偶相生則天位乎  
上地位乎下而人位乎中世必篤生英雄豪傑賦之以全才督之

以重任使之斡旋造化調燮陰陽過則掾之闕則補之自身而家而國而天下莫不以其精神爲之經畫毫不容有纖悉缺陷今張令之言敷於三十五條之下善且盡矣默印陰陽之理條且暢矣尼父曰十室之邑必有忠信一言之善可以興邦故以言而定其人由邑而觀其志志者事之實也言者身之文也昔者陳平宰社肉甚均父老曰善平曰使平得宰天下亦如此肉張令之志蓋有深意存焉今茲志書謂之黔陽縣志亦可謂之張令縣志亦可余喜而弁之是爲序

張扶翼

霍邱人黔陽縣知縣

黔陽縣志敘

康熙五年

邑之有志凡以志乎邑之事也而所以志事之義存焉則存乎作者之志矣子輿氏曰晉之乘楚之檇杙魯之春秋一也春秋之義

黔陽縣志

卷第五十七 文編一

四

經大聖人之筆削而經始名若晉楚之乘與檇杙亦獲與於大聖之筆削其書當至今存焉可也然則國各有史亦各有義存焉矣不然何取於備載之繁文而纍纍貫貫者耶義者何勸戒是也事取乎既往而義存乎勸戒所謂作者之志也故有一邑也必有一邑之輿圖沿革星野界至災異山川形勝風俗城郭宮室田賦戶口徭役物產秩官人物選舉節烈方外藝文區分而類析之沿革何以興廢星分何以災祥山川何以形勝風俗何以涸瀆財賦何以盈虛戶口何以消息徭役何以平頗城郭宮室何以盛衰秩官選舉何以得失孝子烈女何以有無其所爲大書特書不一書者夫固不僅於有則書之之文而已也事志而所謂志者亦至焉則事舉而舉事之義存焉矣夫非作者之志歟黔邑自疊罹兵燹來順治戊戌年始再入版圖當時所謂文獻者無復有存焉矣邇年

以來

上治廣敷訖於山海文教隆焉恭逢各上臺志存今昔義取勸懲  
徵書日下檄取邑志彙成一省完書甚盛典也顧舊志殘缺文獻  
無存日夕窮搜竊有端緒分其目爲書三十五篇目之端各爲一  
論夫論者義也又倫也所以進議乎此事之初終條理也別其卷  
爲十區識之於其類也夫黔巖邑也土瘠而民勞士愿而女樸無  
所爲可喜可愕者足爲網羅聞見者資然而治之易治擾之亦易  
擾觀其所以志是者而治道備焉矣然則志也者志也不惟方志  
其事而已春秋之義存焉則又治之事也書成爲序其所以志者  
如此如曰是亦作者之志也敢乎哉

向文煥

邑人

黔陽縣志序

康熙五年

黔陽縣志

卷第五十七

文編一

五

霍邱張公尹吾黔之四年修邑志閱三月書成攷舊志之作自宋  
昭武饒公敏學手定之在元則朵兒赤雲甫明則西蜀余公茹遞  
修之兵燹後舊本散亡康熙改元公始來爲政時

天子昭宣文治詔郡邑修志事成一代之典徵書數至顧杞宋無  
存公雖願學焉未逮也至是得遺書於故老文字殘闕公慨然曰  
國有史邑有志其義一也言之不文文之失實非志之義也然作  
者之事聖且不能我則修之文獻有徵何敢多讓焉夫儒者修明  
典故徒取記載之文而表章之吾之志終無以自見於天下後世  
曷貴乎於是乃即舊文而正其得失補其闕略參訂加詳焉自輿  
地有圖沿革分野山川形勝物產皆有紀城郭宮室規畫系焉論  
水旱災異先修救之道風俗賦役權因革損益之宜若夫秩官人  
物選舉忠孝節烈則紀其人述其事微顯闡幽而勸懲之義備焉

舊志藝文則闕有間矣自楚懷王下迨秦氏歷漢唐宋明迄於昭代代有作焉搜諸簡篇訪之遺逸亦得之殘碑斷碣之中故忠臣愛國覽物留連名士詠懷道揚風雅表既往之軼事發潛德之幽光得屈子涉江一篇太史公以下傳記序凡十一篇杜少陵王龍標李青蓮劉文房文徵明中丞顧公巡憲陳公邑令余公朱公詩凡四十九篇公所著記傳說序凡十篇古詩近體凡二十一篇輯爲成書夫因乎舊文示不敢作也公之志也序次爾雅考核精詳或先事以起義或錯綜以晰理指事切立言微詞不煩而意旨高深是修之之志也斯不亦煌煌邑史乎異日者公車北上獻之宰相上之

天子可於典章載籍之林庶幾昭同文之盛云文煥名既不登於仕籍卑且賤焉誠未敢贊一詞雖然吾邑民也公之志志吾邑也

黔陽縣志

卷第五十七 文編一

六

自有此志後之治吾邑者披覽是編得公之志而存之吾民將承休有永也何不可拜手而颺言

王光電

西吳人黔陽縣知縣

### 增輯縣志敘

電 治黔陽之六年值

國家休養生息民安物阜黔陽雖僻處楚邊徭蠻錯雜無不歌咏太平以恬以熙田賦日益闢戶口日益蕃孝子節婦彪炳閭閻騷客詞人輝煌鬢序 電 材薄能菲復爲竭蹶從事其間勸墾以補認墾之額創義學以廣正學之傳修葺城垣崇隆壇壝添設外禁固監獄也蓋造倉廩重積貯也歲壬子

文廟被大風雨

崇聖祠櫺星門俱爲傾圮 電

首倡捐貲偕儒學

俞岳

兩先生暨邑

中紳士重加整頓丹青葺瓦較舊制恢宏壯麗觀瞻彌肅  
武廟歷無後殿癸丑春鳩工庀材另設後殿神座奉  
關聖三代春秋展祀務合乎當代典禮而止並虔整  
聖像金身絢赫色相莊嚴一時稱盛事焉通邑田地山岡惟憑康  
熙三十八年丈量印冊民是以不爭然積久弊生蠹書猾棍往往  
添改塗抹混侵混佔涉訟不休余爲捐備紙筆喚集闔邑冊書照  
造鈴印存衙貯以大廚亦庶幾章程一定弊無由作歟黔陽水道  
上通滇黔下接兩湖帆檣絡繹而灘河陡險牽挽維艱奉  
特旨修理湖南通省緯路確估報銷奉文委岳糧廳李查勘電躬  
親會勘通縣緯路不平暨缺口處所填砌架橋約估計工料銀一  
百四十餘兩竊念事關通商便民業已身任地方尙敢動支  
帑項不爲

黔陽縣志

卷第五十七

文編一

七

君父分憂乎遂申請於養廉內捐修工完之日報竣夫士人出效  
一官宰一邑分宜興養興教爲

朝廷化民成俗用登上理其他即間有更張興廢舉墜揆之政體  
抑末也本不足以信今而傳後適因縣志舊板磨滅亟宜校刻又  
自康熙五年張子容園刊定後數十年來如戶口田賦節孝文學  
有待于增入志內者未易枚舉用是旁羅博採登之梨棗有來告  
電者曰君任內所有事皆關地方緊要今增志而弗爲登載仍不  
無缺遺之憾豈所稱大備者哉不得已併付劄劂並略爲敘述弁  
之志首亦俾後之君子弗以瘵官見誚焉斯幸矣

姚文起

中州人黔陽縣知縣

重修黔陽縣志序

乾隆五十四年

志之爲言識也所以考山川圖籍而觀興廢沿革政治風教之由

者皆於是乎在也黔自宋邑令饒敏學始修縣志而繼以元之朵兒赤雲甫明之余茹其書亦先後略備矣然迭經兵燹殘缺實多至

國朝康熙丙午張令扶翼雍正癸丑王令光電續修之迄於今又五十餘年矣政治之光昌風教之涵濡人物之奮興日新月盛何可不志之以徵得失而資考鏡歲在戊申適 府憲檄修沅州府志及次年己酉邑紳士請於予曰縣志久宜增輯得明府爲政則可以垂世而行遠矣予查府志曾修於乾隆二十年丁丑主修則府憲塘公而秉筆則武陵朱公也博采羣書參以湖南通志頗稱完善然卷帙浩繁不無詳於府而略於邑則黔志誠不容以不修矣予公冗弗克獨任因即以邑中危唐二孝廉設立志局匪第新入者斟酌無遺而舊載者整理尤密即如名宦鄉賢必待題請准黔陽縣志

卷第五十七 文編一

八

行非可冒濫其稱錢糧戶口之則例各項支銷之增減皆關一邑之章程不容少有舛錯今一一考正之諸位名宦大員未載事實殊屬憾事今查省志補入之其前令之條議以及詩傳歌行記序附登各門以便觀覽此則其異於舊者也予承乏七年風土人情知之頗悉而又得諸君子矢公矢慎相與採輯書成若干卷非敢云無憾也亦庶幾使饒余諸令經營斯邑之苦心有藉以傳述云爾

向達禮

溆浦人國子監肄業報滿候補儒學訓導

重修黔陽縣志敘

書列九州風傳十五志之所由昉也黔居楚南於詩無風於書之荆及衡陽甚遠宜無可志矣抑思吳越不登上國今之江浙何如者風俗與化移易非可以耳食而目論也黔陽乃龍標舊地自昔



號爲美治民情樸茂勤於耕讀其婦女亦恪守閨門以視山區澤國習爲淫靡者風教固殊焉不志則已志之則山明水秀可指也土辟田治可數也民安物阜風清俗美可咏而可歌也而且人材之蔚起科甲之重開幽光潛德忠貞節孝之藉藉人口尤不可聽其湮沒而弗彰也歲在戊申 府憲張有重修郡志之役己酉秋紳士乃請於 邑侯姚公謂縣志間修已五十餘年其舊者固多不醕即今府志亦恐未備欲成完善之書斷非明府不爲功且昔之官斯土者跡如傳舍而邑之興廢沿革未暇議及自 公臨七載構書院新壇社建駐防大修文廟兼營考棚別荆公館山城氣象煥然一新固黔之大幸也更何可不志以傳於後於是分門別類采核詳明補闕訂訛義例整肅付諸剞劂亦足以覘邑運之隆興而備楚風之一覽矣是志也

黔陽縣志

卷第五十七 文編一

九

公爲總裁而稿輯於危君用五唐君才少禮不敏亦襄事焉例得弁言以識故樂其成而爲之敘

危元福 邑人

### 黔陽縣志序

周官職方氏掌天下之圖小史掌邦國之志又有外史掌四方之志志之作也所以比事類情周悉夫天地民物之變著典要而觀政理也我

朝版章孔厚車書大同

欽定大清一統志美矣盛矣其下有各省志又有各郡志而邑志實爲之端苟乏成書則無以備一時之採擇而教化暨訖之區不幾自外於文物聲明之盛與我邑舊志初創於 張公蓉園繼增於 王公劔虹收採非不富也然或失則舛矣乾隆丁丑上憲舉

修湖南通志而我 府憲塘公因先輯沅州府志以應爾時於黔  
邑事實編次非不當也然或嫌於略矣昔之舛者不可仍於今府  
之略者未可概諸縣會歲戊申府憲 張有修志之檄而我 邑  
侯姚公因慨然諭於眾曰欲修府志合先輯縣志查府志自丁丑  
訖今間三十年而議修而縣志自增輯後至今且五十餘年因時  
起事誠未可再緩爰即龍標書院開局纂修謂 福 等生長於斯當  
熟於見聞俾具稿以獻侯乃於政事之暇一一校讐義例惟精體  
裁務整記事恐滋浮僞選言惟取雅馴書既成授之劄劄遂覺天  
地民物之故昭然悉揭而典要既詳即政事之宜亦於是乎在持  
此以備采風使彈丸小邑得與  
聖朝文物聲明之盛侯之爲功大矣而以福之拙亦得附簡端以  
垂不朽何其幸與謹序

黔陽縣志

卷第五十七

文編一

十

唐廷佐

邑人

黔陽縣志敘

吾邑建置自漢始問所爲志則由明以前都不可得非無志也蓋  
疊遭兵火而文物典章散佚盡矣

國朝順治十五年始再入版圖康熙初 張公蓉園手纂邑志當  
斯時也老成凋謝求故籍於灰燼之餘所謂千伯而什一者也因  
陋就簡勢使之然雍正間 王公劔虹踵而修之亦祇將近事增  
益釐正舊文未遑也

皇上龍飛之二十二年 府憲塘創修沅志探源諸史於前志缺  
略者補荒誕者刪體裁義法稱完善焉而吾邑志猶故今 姚侯  
慎亭中州名進士四十七年來宰吾邑百廢具興歲戊申府憲  
張適有重修府志之檄 侯慨然謂邑志間修者殆將六十年且

素乏善本較府志當倍急因與邑衆合謀於戊申冬十二月開局  
委佐偕二三同事共肩編摩而侯總厥成佐等既承命大懼弗稱  
以辜盛舉早夜孜孜五閱月然後脫稿昔江淹有言史莫難於志  
佐豈敢自謂能所幸者生逢

昭代重熙累洽之餘制作備而文獻足徵因之得所藉手以告無  
罪焉耳且 侯之爲是舉也豈惟考今日圖經備他年掌錄區區  
文字云乎哉按城社則思守焉覈貢賦則思養焉訪禮俗則思教  
焉吏茲土者書其宦績將則而倣焉生茲土者書其德行又將勸  
而勉焉事無鉅細宜分理即宜周知此又吾 侯採輯之深意而  
邑士庶之所禱祀而求焉者也書成付梓謹述顛末用詔方來